




HADIS 40

OBJEKTIF KURSUS KESELURUHAN:

- a) **Memahami konsep Hadis 40:** Peserta akan memperoleh pemahaman mengenai Hadis 40 termasuk sejarah penyusunan, latar belakang pengarangnya serta peranan Hadis 40 dalam tradisi hadis Islam.
- b) **Mengenalai hadis-hadis utama dalam agama Islam:** Peserta akan mengenali dan mempelajari teks-teks Hadis 40 yang paling terkenal, memahami konteks dan makna setiap hadis serta aplikasinya dalam kehidupan seharian.
- c) **Menghayati pengajaran Hadis 40:** Peserta akan mengkaji dan memahami pengajaran moral, etika dan hukum yang terkandung dalam Hadis 40 serta implikasinya terhadap amalan hidup.
- d) **Mengaplikasikan hadis dalam kehidupan:** Peserta akan mempelajari cara-cara untuk mengaplikasikan pengajaran Hadis 40 dalam kehidupan peribadi, keluarga dan masyarakat serta mengintegrasikan nilai-nilai hadis dalam tindakan sehari-hari.
- e) **Menilai kepentingan Hadis 40 dalam agama Islam:** Peserta akan menilai kepentingan Hadis 40 dalam memahami syariat Islam secara menyeluruh serta peranannya dalam memperkuat iman dan amalan dalam masyarakat Muslim.

HADIS KEEMPAT: TAHAP PENCIPTAAN MANUSIA DAN KETENTUAN TAKDIR

عَنْ أَبِي عَبْدِ الرَّحْمَنِ عَبْدِ اللَّهِ بْنِ مَسْعُودٍ رَضِيَ اللَّهُ عَنْهُ قَالَ: حَدَّثَنَا رَسُولُ
اللَّهِ صَلَّى اللَّهُ عَلَيْهِ وَسَلَّمَ وَهُوَ الصَّادِقُ الْمَصْدُوقُ:

Diriwayatkan daripada Abu Abdul Rahman Abdullah bin Mas'ud r.a., katanya,
"Rasulullah SAW menceritakan kepada kami dan Baginda seorang yang benar
lagi dibenarkan:

إِنَّ أَحَدَكُمْ يُجْمَعُ خَلْقُهُ فِي بَطْنِ أُمِّهِ أَرْبَعِينَ يَوْمًا. ثُمَّ يَكُونُ عَلَقَةً مِثْلَ ذَلِكَ.
ثُمَّ يَكُونُ مُضْغَةً مِثْلَ ذَلِكَ. ثُمَّ يُرْسِلُ اللَّهُ إِلَيْهِ الْمَلَكَ، فَيَنْفُخُ فِيهِ الرُّوحَ وَيُؤَمَّرُ
بِأَرْبَعِ كَلِمَاتٍ: بِكِتَابِ رِزْقِهِ وَأَجَلِهِ وَعَمَلِهِ وَشَقِيٍّ أَوْ سَعِيدٍ.

'Sesungguhnya seseorang daripada kamu dikumpulkan kejadiannya di dalam
perut ibunya selama 40 hari yang berupa air mani. Kemudian menjadi segumpal
darah seperti yang demikian itu. Seterusnya, menjadi seketul daging seperti yang
demikian itu juga. Setelah itu, diutuskan kepadanya malaikat, lalu ditiupkan roh
padanya dan malaikat tersebut diperintahkan menulis empat perkara; rezekinya,
umurnya, amalannya dan sengsaranya atau bahagiannya.'"

قَوَالَهُ الَّذِي لَا إِلَهَ غَيْرُهُ، إِنَّ أَحَدَكُمْ لَيَعْمَلُ بِعَمَلِ أَهْلِ الْجَنَّةِ حَتَّى مَا يَكُونُ بَيْنَهُ وَبَيْنَهَا إِلَّا ذِرَاعٌ، فَيَسْبِقُ عَلَيْهِ الْكِتَابُ، فَيَعْمَلُ بِعَمَلِ أَهْلِ النَّارِ، فَيَدْخُلُهَا. وَإِنْ أَحَدَكُمْ لَيَعْمَلُ بِعَمَلِ أَهْلِ النَّارِ حَتَّى مَا يَكُونُ بَيْنَهُ وَبَيْنَهَا إِلَّا ذِرَاعٌ، فَيَسْبِقُ عَلَيْهِ الْكِتَابُ، فَيَعْمَلُ بِعَمَلِ أَهْلِ الْجَنَّةِ، فَيَدْخُلُهَا.

“Maka, demi Allah SWT yang tiada tuhan selain-Nya, sesungguhnya seseorang daripada kamu mengerjakan amalan ahli syurga sehingga tiada jarak di antaranya dengan syurga melainkan sehasta, namun, ketentuan takdir mendahuluinya, lalu dia pun mengerjakan amalan ahli neraka, maka masuklah dia ke dalam neraka. Dan sesungguhnya seseorang daripada kamu mengerjakan amalan ahli neraka sehingga tiada jarak di antaranya dengan neraka melainkan sehasta, namun, ketentuan takdir mendahuluinya, lalu dia pun mengerjakan amalan ahli syurga, maka masuklah dia ke dalam syurga.”

رَوَاهُ الْبُخَارِيُّ وَمُسْلِمٌ.

Hadis ini diriwayatkan oleh al-Bukhari dan Muslim.

Antara pelajaran dan pelaksanaan inti pati hadis dalam kehidupan yang boleh diambil ialah:

1. Kedudukan Nabi SAW yang begitu tinggi dalam kalangan para sahabat sehingga sahabat memuji Baginda SAW sebagai seorang yang benar dan dibenarkan.
2. Antara hikmah Allah SWT menciptakan manusia mengikut tertib dan secara beransur-ansur dari satu proses ke proses yang lain (sedangkan Dia mampu dan berkuasa sahaja menjadikannya secara cepat) adalah:
 - a) Menepati sebab dan musabab serta mukadimah dan natijah.
 - b) Allah SWT mengajarkan agar hamba-Nya tenang dan berwaspada dalam urusan tanpa sikap tergesa-gesa.
 - c) Sebagaimana kesempurnaan zahir terjadi secara beransur-ansur, sebegitu jugalah kesempurnaan maknawi. Manusia sewajarnya bertindak mengikut proses yang sebegini rupa dalam penyusunan hidupnya.
3. Saranan untuk berbuat baik terhadap ibu bapa. Semua proses yang diceritakan ini berlaku di dalam rahim seorang ibu.
4. Mengambil pengajaran tentang kematian agar kita tidak terperdaya dengan amalan-amalan baik yang dilakukan dalam kehidupan kerana kita juga perlu takut dan bimbang agar tidak ditakdirkan mati dalam keburukan.
5. Saranan agar sentiasa berdoa kepada Allah SWT supaya diteguhkan keimanan dan tidak terpesong daripada jalan hidayah.
6. Setiap yang berlaku adalah mengikut kepada qadak dan qadar Allah SWT.

SENARAI RUJUKAN PENTING

1. Al-Arba'un al-Nawawiyyah cetakan Dar al-Minhaj.
2. Al-Kafi dan Tatmim al-Kafi: Syarah Hadis 40: Dr. Zulkifli Mohamad al-Bakri.
3. Syarah Hadis 40 Al-Nawawiyyah: Zulhimi Mohamed Nor, Mohd Yusuf Ismail, Amiruddin Mohd Sobali dan Ahmad Sanusi Azmi.
4. Syarah Hadis 40 Imam Ibnu al-Aththar: Terjemahan dan Huraian Dr. Mohd Solleh bin Ab. Razak.
5. 40 Hadis Imam Nawawi: Sebuah Huraian untuk Dunia Semasa: Ali Jum'ah: Terjemahan Lajnah Penterjemahan APT.
6. Modul Penghayatan Hadis 40 Imam Nawawi: Kementerian Pendidikan Malaysia.
7. Al-Wafi fi Syarh al-Arba'in Al-Nawawiyyah: Dr. Mustafa al-Bugha.
8. Jami' al-'Ulum wa al-Hikam: Ibn Rajab al-Hanbali.